

Peqqinnissaqarfiup aqunneqarnera, aaqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaannik Namminersorlutik Oqartussat nalunaarutaat

Matumuuna Peqqinnissaqarfiup aqunneqarnera, aaqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. november 2010-meersoq, Inatsisartut inatsisaat nr. 2, 29 maj 2012-imeersoq malillugu allannguutitalik nalunaarutigineqarpoq. Aamma Inatsisartut peqqussutaat Peqqinnissaqarfiup iluani napparsimasut naammagittaalliuuteqarsinnaanerit taarsiiffigineqarsinnaanerallu pillugit Inatsisartut inatsisaat nr. 50, 25. November 2024

Qitiusumik aqutsineq

§ 1. Naalakkersuisut peqqinnissaqarfimmi sulineq aqussavaat, pilersaarusiussavaat nakkutigalugulu.
Imm. 2. Naalakkersuisut peqqinnissaqarfimmi inuit suliaminnut atatillugu sulinertik pillugu nalunaarutiginnittaqullugit nalunaaruteqartaqqullugillu peqqusinnaavaat.

§ 2. Peqqinnissamut tunngatillugu sullissinerup ineriartortinneqarnerani Naalakkersuisut pilersaarusiortuussapput ataqatigiissaarisuullutillu.

Peqqinnissamut tunngasutigut sullissisut aamma tarnip pissusaanik ilisimasallit

§ 3. Naalakkersuisut peqqinnissamut tunngasutigut sullissisut peqqinnissaqarfiup iluani, pisortat oqartussaasuini allani namminersortunilu peqqinnissamut tunngasutigut sulinerat pillugu malittarisassanik erseqqinnerusunik aalajangersaasinnaapput.

Imm. 2. Naalakkersuisut tarnip pissusaanik ilisimasallit peqqinnissaqarfiup iluani, pisortat oqartussaasuini allani namminersortunilu ilinniakkaminnut tunngasutigut sulinerat pillugu malittarisassanik erseqqinnerusunik aalajangersaasinnaapput.

§ 4. § 3-mi, imm. 1-imi aamma imm. 2-mi malittarisassat aalajangersakkanik imaattunik imaqarsinnaapput:

- 1) Atorfiup taaguutaanik illersugaanera.
- 2) § 3-mi, imm. 1-imi aamma imm. 2-mi inuit taaneqartut pisussaaffii.
- 3) Katsorsartittut pisinnaatitaaffii.
- 4) Nakkutilliineq.
- 5) Pineqaatissiinissamut aalajangersakkat, tak. § 12.
- 6) Pissutsit allat § 3-mi, imm. 1-imi aamma imm. 2-mi inunnut taaneqartunut sulianillu isumaginninnermut pingaaruteqartut.

Pinaveersaartitsinermut ataatsimiititaliat

§ 5. Naalakkersuisut illoqarfinni tamani pinaveersaartitsinermut ataatsimiititaliamik pilersitsissapput.

Imm. 2. Pinaveersaartitsinermut ataatsimiititaliat suliassaraat najukkami peqqinnikkut iluaqutaasinnaasunik pinaveersaartitsinernillu suliaqarnerit patajaallisarneqarnissaat. Tamatumani aamma Naalakkersuisut tunngaviliussaasa iluanni:

- 1) pinaveersaartitsinermik suliaqarneq aqquutigalugu kommunip peqqinnikkut inissisimaneranut sunniuteqarnerup akisussaanerullu najukkami patajaallisarneqarnissaat,
- 2) kommunip iluani pinaveersaartitsinermik peqqinnikkullu iluaqutaasinnaasunik suliaqarnerup ataqatigiissumik aaqqissuunneqarnerata pingaarnersiorneqarneratalu patajaallisarneqarnissaat, aamma
- 3) peqqinnissaqarfiup tassungalugu attuumassuteqartut suleqatigiinnerisa itisilerlugulu patajaallisarneqarnissaa.

Imm. 3. Pinaveersaartitsinermut ataatsimiititaliat suliassanik inunnut ataasiakkaanut tunngasunik suliaqassanngillat.

Imm. 4. Sumiiffinni kommuninut agornilersuinerup avataanniittuni Naalakkersuisut pinaveersaartitsinermut ataatsimiititalianik pilersitsisinnaapput. Naalakkersuisut pissutsini immikkut ittuni imm. 1-imi taaneqartut saniatigut kommuninut agornilersuinerup iluani pinaveersaartitsinermut ataatsimiititalianik pilersitsisinnaapput.

Imm. 5. Pinaveersaartitsinermut ataatsimiititaliat inuttalersugaanerat sulinerallu pillugit Naalakkersuisut malittarisassanik erseqqinnerusunik aalajangersaassapput.

Peqqinnissaqarfiup aaqqissuussaanera

§ 6. Nuna najukkani peqqinnissaqarfinni aqutsivinnut agornilersorneqassaaq.

Imm. 2. Dronning Ingridip Napparsimmavissua nuna tamakkerlugu napparsimmaviuvoq.

Imm. 3. Nunap peqqinnissaqarfinni aqutsivinnut agornilersorneqarnera, aaqqissuunneqarnera suliaallu pillugit, kiisalu Dronning Ingridip Napparsimmavissuata nunamut tamarmut suliai pillugit Naalakkersuisut malittarisassanik aalajangersaassapput.

Nunatta Nakorsaaneqarfia

§ 7. Peqqinnissamik sullissinermut tunngasut pillugit Naalakkersuisunut oqartussaasunullu allanut siunnersuisarlunilu allatigut ikiuuttartussamik Naalakkersuisut Nunatta Nakorsaaneqarfianik pilersitsissapput.

Imm. 2. Nunatta Nakorsaaneqarfia Naalakkersuisut peqqinnikkut inissisimanermik sianiginninnerannik ikiussavai.

Imm. 3. Nunatta Nakorsaaneqarfia peqqinnissamut tunngasutigit inuit peqqinnissaqarfiup iluani sulinerannik aamma tarnip pissusaanik ilisimasallit peqqinnissaqarfiup iluani sulinerannik nakkutilliissaaq.

Imm. 4. Nunatta Nakorsaaneqarfia peqqinnissaqarfiup iluani sullissivinni peqqinnissamut tunngasutigit sulinerannik nakkutilliissaaq.

§ 8. Nunatta Nakorsaaneqarfia peqqinnissaqarfimmi unioqqutitsisoqarsimaneranik amigaateqartoqarneranilluunniit paasisaqaruni oqartussaasunut pineqartunut pisariaqartitsineq naapertorlugu ilisimatitsissaaq. Aammattaaq peqqinnissamut tunngatillugu immikkut pisariaqartoqalersillugu Nunatta Nakorsaaneqarfia tamanut ammasumik paasisutissiisassaaq.

§ 9. Nunatta Nakorsaaneqarfia sulinera pillugu malittarisassat sukumiinerusut Naalakkersuisut aalajangersassavaat.

Imm. 2. Naalakkersuisut malittarisassanik aalajangersaasinnaapput, Nunatta Nakorsaaneqarfia peqqinnissamut tunngasutigit sullissisut peqqinnissaqarfiup avataani pisortat oqartussaaffiini namminersortunilu sulinerannik, aamma tarnip pissusaanik ilisimasallit peqqinnissaqarfiup avataani pisortat oqartussaaffiini namminersortunilu sulinerannik nakkutilliinissaanik.

Imm. 3. Naalakkersuisut malittarisassanik aalajangersaasinnaapput, Nunatta Nakorsaaneqarfia peqqinnissaqarfiup avataani pisortat oqartussaaffiini namminersortunilu pissutsinut peqqinnissamut tunngasunut, aamma peqqinnissaqarfiup avataani pisortat oqartussaaffiini namminersortunilu tarnip pissusaanik ilisimasallit atuunnerannut pissutsinut nakkutilliinissaanik.

Imm. 4. (Atorunaarsinneqarpoq).

§ 10. Inuit aamma sullissiviit §§ 7-imi aamma 9-mi taaneqartut pisussaaffeqarput Nunatta Nakorsaaneqarfiata qinnuteqarnera naapertorlugu paasissutissanik tamanik nakkutilliinerup ingerlanneqarnissaanut pisariaqartinneqartunik tunniussinissaminut.

Imm. 2. Nunatta Nakorsaaneqarfia eqqartuussinikkut aalajangiinertaqanngitsumik, aamma inatsisitigut naapertuuttumik uppersaammik takutitsinikkut kalerreeqqaarani sullissivinnik § 7-imi, imm. 4-mi, aamma § 9-mi, imm. 3-mi taaneqartunik nakkutilliisinaatitaavoq.

Naammagittaalliuuteqarsinnaaneq

§ 11. Peqqinnissaqarfinni aqutsiviit aamma Peqqissutsimut Naalakkersuisoqarfiup peqqinnissamut tunngasutigut naammagittaalliuuteqarsinnaaneq pillugu innuttaasunut paasissutissiisarnissaq ilitersuisarnissarlu pisussaaffigaat.

§ 11a. (Atorunnaarsinneqarpoq).

§ 11b. (Atorunnaarsinneqarpoq).

Pineqaatissiinerit

§ 12. Inatsisartut inatsisaanni matumani §§ 3 aamma 4 aalajangersakkat naapertorlugit najoqqutassiani aalajangersaasoqarsinnaavoq, najoqqutassiani aalajangersakkanik unioqqutitsisoqarsimatillugu pinerluuteqarsimasut pineqaatissiinikkut akiliisussanngortitaasoqarsinnaasoq.

Imm. 2. Inatsisartut inatsisaanni matumani §§ 3 aamma 4 aalajangersakkat naapertorlugit malittarisassiat piginnaatitsippata akiliisitsilluni pineqaatissiisoqarsinnaavoq, Kalaallit Nunaanni pinerluttulerinermi inatsimmi malittarisassat malillugit inuup inatsisitigut pisinnaatitaasup akiliisinneqarnissamik peqquneqarneratigut.

Imm. 3. Inatsisartut inatsisaanni matumani §§ 3 aamma 4 aalajangersakkat naapertorlugit malittarisassiat malillugit pineqaatissiilluni akiliisitsinerit Nunatta Karsianut akiliutigineqassapput.

Imm. 4. Imm. 1 aamma imm. 2 naapertorlugu pineqaatissiinissaq pillugu suliasat, Kalaallit Nunaata Eqqartuussivianut suliasaqarfittut siullertut suliasanngortinneqassapput.

Atortuulersitsineq

§ 13. Inatsit manna ulloq 1. marts 2011 atuutilerpoq.

Imm. 2. Peqatigitillugu Peqqinnissaqarfiup aquanneqarnera aaqqissuussaanelu pillugit Inatsisartut peqqussutaat nr. 3, 23. maj 2000-meersoq atorunnaarsinneqarpoq.

Imm. 3. Malittarisassat, Inatsisartut peqqussutaat nr. 3, 23. maj 2000-meersoq tunngavigalugu aalajangersarneqarsimasut atuutiinnassapput, malittarisassanik Inatsisartut inatsisaat manna Inatsisartulluunniit inatsisaat allat tunngavigalugit aalajangersarneqarsimasunik taarserneqarnissamik atorunnaarsinneqarnissamilluunniit tungaanut.

Imm. 4. Katsorsaanermi ikiortit pillugit inatsit nr. 154, 8. maj 1968-meersoq, kigutit nakorsaat pillugit inatsit nr. 276, 26. maj 1976-meersoq, nakorsat sulinerat pillugu inatsisip Kalaallit Nunaannut atortuulersinneqarnera pillugu aalajangersagaq nr. 860, 18. december 1991-meersoq aamma peqqissaasut sulisinnaatitaanerit sulinerallu pillugit inatsisartut peqqussutaat nr. 7, 30. oktober 1995-meersoq Inatsisartut inatsisaat manna Inatsisartulluunniit inatsisaat allat tunngavigalugit aalajangersarneqarsimasunik taarserneqarnissamik atorunnaarsinneqarnissamilluunniit tungaanut atuutiinnassapput.

Inatsisartut inatsisaat nr. 2, 29. Maj 2012 (Napparsimasut Peqqinnissaqarfimmut Maalaarutaannik Aalajangiisartoqatigiinnut maalaaruteqarsinnaaneq)^[1] atortuulersitsinermut aalajangersakkanik tullinnguuttunik imaqarpoq:

Inatsisartut inatsisaat manna ulloq 1. juni 2012-mi atuutilissaaq

Imm. 2. Tamatumunnga peqatigitillugu peqqinnissamut tunngasut qitiusumik siulersorneqarnerat il.il. pillugit inatsimmi nr. 397-imi 10. juni 1987-imeersumi kapitali 3, inatsisikkut nr. 391-ikkut 7. juni 1989-imeersukkut aammalu inatsisikkut nr. 369-ikkut 6. juni 1991-imeersukkut aamma inatsisikkut nr. 503-kkut 30. juni 1993-imeersukkut allanngortinneqartoq, atorunnaarsinneqarpoq.

Inatsiaartut inatsisaat nr. 50, 25. november 2024 (Peqqinnissaqarfiup iluani napparsimasut naammagittaalliuteqarsinnaanerata taarsiiffigineqarsinnaanerallu pillugit Inatsisartut inatsisaat)^[ii] atortuulersitsinermut aalajangersakkanik tullinnguuttunik imaqarpoq:

§ 32. Inatsisartut inatsisaat nalunaarutigineqarnermini atuutilissaaq.

Imm. 2. Inatsisartut inatsisaanni kapitali 2, peqqinnissakkut ilinniarsimasutut sulineq pillugu naammagittaalliutitut tunngasoq, Inatsisartut inatsisaata atuutilersinneqareernerata kingorna katsorsaanernut atuuppoq.

Imm. 3. Inatsisartut inatsisaanni kapitali 3, napparsimasut ajoqusernerinut taarsiissuteqarnissamut tunngasoq, Inatsisartut inatsisaata atuutilersinneqareernerata kingorna ajoqusersimanernut atuuppoq.

Peqqissutsimut inunnullu Innarhuutilinnut Naalakkersuisoqarfik, ulloq 8. september 2026

Aka Olesen (atsior.)
Naalakkersuisoqarfimmi pisortaq

/ Karen K. Jakobsen (atsior.)

^[i] Inatsimmut allannguut § 11-mut qulequttap allanngortinneqarneranut, § 11a, § 11b, § 12, imm. 1-3-p ikkunneqarnerannut tunngavoq.

^[ii] Inatsimmut allannguutit ukununnga tunngapput § 9, imm. 4., § 10, imm. 2 aamma imm. 3., § 11a., § 11b, § 12, imm. 1-3-mut tunngavoq.

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut